

## UGOVOR o javnoj nabavi električne energije

Federalno ministarstvo kulture i sporta, Obala Maka Dizdara, Sarajevo, BiH,  
Koga zastupa: Ministrica, Sanja Vlasisavljević (u daljem tekstu: Kupac),

i

Javno preduzeće Elektroprivreda Bosne i Hercegovine d.d., Ul. Vilsonovo šetalište 15, Sarajevo, BiH, koga zastupa: Dr. sci. Sanel Buljubašić, v.d. Generalni direktor i Dr. sci. Nevad Ikanović, v.d. Izvršni direktor za snabdijevanje i trgovinu (u daljem tekstu: Snabdjevač),

### I PREDMET UGOVORA

#### Član 1.

Predmet ovog ugovora je snabdijevanje električnom energijom i obračun i fakturisanje usluga korištenja mreže prema utvrđenim uslovima korištenje distributivne mreže Operatora distributivnog sistema (u daljem tekstu: ODS), definisanje odnosa, prava i obaveza između Snabdjevača i Kupca koji ima status kvalifikovanog kupca električne energije, po nadmetanju broj: TD-1232-7-1-30/24.

#### Član 2.

Na sve što nije regulisano ovim ugovorom primjenjivat će se odredbe sljedećih propisa: Zakon o električnoj energiji, Zakon o obligacionim odnosima (u daljem tekstu „ZOO“), važeći akti: Pravilnik o promjeni snabdjevača, Opšti uslovi za isporuku električne energije (u daljem tekstu „Opšti uslovi“), Mrežni kodeks, Tržišna pravila, Odluka o tarifnim stavovima za korisnike distributivnog sistema, Zakon o korištenju obnovljivih izvora energije i efikasne kogeneracije, Dozvolu za obavljanje djelatnosti snabdijevanja i trgovine električnom energijom. Zakon o finansijskom poslovanju i akti koji u toku važenja ovog Ugovora na novi način urede pitanja regulisana navedenim propisima, odnosno aktima, kao i ostali zakonski i podzakonski akti koji tretiraju ovu materiju.

#### Član 3.

Sastavni dio ovog Ugovora je Obrazac za cijenu ponude.

### II SNAGA I KOLIČINA ELEKTRIČNE ENERGIJE

#### Član 4.

Snabdjevač će isporučivati, a Kupac će za vrijeme trajanja ovog Ugovora preuzimati snagu i električnu energiju.

Način obračuna električne energije vrši se prema ponuđenim cijenama električne energije definisanim u Obrascu za cijenu ponude.

Kupac je obavezan da koristi električnu energiju i snagu u skladu sa ovim ugovorom.

Potpisivanjem ovog ugovora Kupac postaje dio Balansne grupe čija je balansno odgovorna strana Snabdjevač koja preuzima troškove debalansa.

### III USLOVI KORIŠTENJA DISTRIBUTIVNE MREŽE

#### Član 5.

Kupac je dužan koristiti priključak i distributivnu mrežu prema uslovima iz elektroenergetske saglasnosti i u skladu sa Opštim uslovima, odnosno u skladu sa Ugovorom o korištenju distributivne mreže zaključenim sa ODS-om.

Ugovorne strane saglasne su da će sve zahtjeve vezane za promjene u korištenju priključka i mreže, uređivati u dogovoru i u skladu sa odredbama Opštih uslova i Mrežnih pravila.

#### **Član 6.**

Kupac je dužan odmah po saznanju, bez odlaganja, obavijestiti ODS o neispravnosti mjernih uređaja i o mogućem nastanku ili oštećenju bilo kojeg dijela mjernog sloga, oštećenju plombi, kao i o mogućem oštećenju mjernog ormara, s tim što kupac ne smije poduzimati nikakve radnje na mjernom mjestu i mjernom uređaju.

### **IV MJERENJE I OČITANJE MJERNIH UREĐAJA**

#### **Član 7.**

Način mjerenja, te uslovi i način očitavanja mjernih uređaja definisani su Ugovorom o korištenju distributivne mreže. Mjerne podatke, na obračunskim mjernim mjestima, utvrđuje ODS u skladu sa važećim Opštim uslovima, Mrežnim kodeksom i Tržišnim pravilima.

Očitavanje mjernih uređaja krajnjih kupca/proizvođača organizuje i vrši ODS. ODS je obavezan izvršiti ispravno i redovno očitavanje mjernih uređaja na svim mjestima primopredaje električne energije.

Mjerni uređaji krajnjih kupaca električne energije očitavaju se u pravilu mjesečno.

ODS je obavezan izvršiti očitavanje mjernih uređaja krajnjih kupaca u slučaju: zahtjeva za promjenu snabdjevača, promjene tarifnih stavova za korisnike distributivnog sistema i privremenog isključenja sa distributivne mreže. Kupac može od ODS-a naručiti nestandardne mjerne usluge, a ODS će ih pružiti i obračunati prema cjenovniku nestandardnih usluga.

Kupac je dužan u svako vrijeme omogućiti pristup obračunskom mjernom mjestu i mjernim uređajima radi održavanja i očitavanja, kao i radi obustave isporuke - isključenja.

### **V NAČIN OBRAČUNA I CIJENA ELEKTRIČNE ENERGIJE**

#### **Član 8.**

Snabdjevač će obračunavati električnu energiju i uslugu korištenja mreže na osnovu mjernih podataka iz člana 7. ovog ugovora. U slučaju kada se mjerenje vrši na naponu nižem, odnosno višem od napona na mjestu isporuke, Snabdjevač će obračunati korekciju obračunskih podataka za iznos gubitaka električne energije na osnovu podataka o gubicima električne energije dostavljenih od strane ODS-a.

#### **Član 9.**

Tarifni stavovi za električnu energiju iz Tabele A. Obrasca za cijenu ponude kao sastavnog dijela ovog Ugovora su fiksni za vrijeme trajanja Ugovora.

U slučaju da dođe do promjene Tarifnih stavova u Tabelama B. i C. Obrasca za cijenu ponude (mrežarina i obnovljivi izvori). Snabdjevač i Kupac su saglasni da se primjenjuju novi tarifni stavovi od dana stupanja na snagu istih, a što u istom obimu mijenja ukupne tarifne stavove.

Na iznos obračunate utrošene električne energije i usluge korištenja mreže Snabdjevač će Kupcu obračunati iznos PDV-a i druge primjenjive naknade u skladu s važećim propisima.

#### **Član 10.**

Snabdjevač će iskazati obračun sa jasnom strukturom, uključujući cijenu korištenja distributivne mreže, posebnu stavku iznosa naknade za obnovljive izvore, porez na dodatnu vrijednost i druge primjenjive naknade u skladu sa ovim ugovorom i važećim propisima, a koje će na računu biti iskazane odvojeno.

### **VI DOSTAVA RAČUNA I PLAĆANJE**

#### **Član 11.**

Snabdjevač dostavlja račun kupcu na osnovu obračuna izvršenog po odredbama ovog ugovora po obračunskom mjernom mjestu, u roku od 5 (pet) dana od datuma izdavanja računa.

Kupcu se račun dostavlja putem pošte, na adresu dostave računa navedenu u Ugovoru, i/ili putem elektronske pošte (ukoliko se kupac pisanim putem izjasni).

Ukoliko se u toku trajanja ovog ugovora Kupac tako opredijeli (pisanim putem ili putem e-mail-a), može izvršiti promjenu načina dostave računa i/ili promjenu adrese ili e-mail adrese dostave računa.

Ako Kupac ne zaprimi račun za obračunski period u ugovorenom roku, dužan je o tome obavijestiti Snabdjevača najkasnije do 15. u mjesecu Snabdjevač će izdati Kupcu kopiju računa bez posebne naknade.

#### **Član 12.**

Rok plaćanja ispostavljenog računa je:

- 15 (petnaest) dana od datuma izdavanja računa ukoliko Kupac na dan izdavanja računa ima dospjelih obaveza po osnovu isporučene električne energije; odnosno
- 30 (trideset) dana od datuma izdavanja računa ukoliko Kupac na dan izdavanja računa nema dospjelih obaveza po osnovu isporučene električne energije.

#### **Član 13.**

U slučaju da Kupac neuredno izmiruje svoje obaveze po osnovu ovog ugovora, Snabdjevač može tražiti, a Kupac je dužan dostaviti Snabdjevaču bankovnu garanciju ili bjanko mjenicu sa mjeničnom izjavom kao garanciju obezbjeđenja plaćanja preuzete električne energije.

Bankarska garancija iz ovog člana se dostavlja sa rokom dužim za dva mjeseca od perioda na koji je zaključen ovaj Ugovor, dok će visina bankarske garancije iznositi dvije prosječne mjesečne fakture Kupca u skladu sa ovim ugovorom.

#### **Član 14.**

Kupac može podnijeti Snabdjevaču prigovor u roku od 15 (petnaest) dana od dana izdavanja računa u kojem djelimično ili u cijelosti osporava račun. Prigovor Kupca ne odgađa plaćanje neosporenog dijela računa.

Snabdjevač je dužan odgovoriti Kupcu na prigovor u roku od 8 (osam) dana od dana prijema prigovora.

Ako je prigovor opravdan, Snabdjevač će izdati novi račun s novim rokom dospijeca. U slučaju neprihvatanja prigovora, Kupac je dužan platiti prvobitno ispostavljeni račun u punom iznosu.

#### **Član 15.**

Kupac je obavezan da obavijesti Snabdjevača o izmjenama odgovarajućih podataka Kupca i podataka vezanih za obračunska mjerna mjesta u toku ugovornog perioda, za podatke koji utiču na obračun i dostavu računa.

Kupac uz dostavljanje kontaktnih podataka ovog Ugovora označava da li je saglasan sa prikupljanjem i obradom ovih podataka od strane Snabdjevača, u svrhu adekvatnog informisanja Kupca od strane Snabdjevača.

### **VII MEĐUSOBNA PRAVA I OBAVEZE**

#### **Član 16.**

Ugovorne strane su saglasne da će se na sve stavke koje eventualno nisu regulisane ovim Ugovorom primjenjivati odgovarajuće odredbe ZOO, Zakona o električnoj energiji, Opštih uslova, Pravilnik o promjeni snabdjevača, propisa koje donosi DERK i FERK kao i drugih propisa iz ove oblasti.

U slučaju izmjena i dopuna važećih propisa i akata ili donošenja novih, a koji utiču na odredbe ovog Ugovora, primjenjivat će se važeći propisi i akti bez zaključenja novog ugovora ili aneksa ovog Ugovora.

### **VIII RASKID UGOVORA I NAKNADA ŠTETE**

#### **Član 17.**

Ugovorne strane su saglasne da u slučaju kršenja Ugovora mogu raskinuti Ugovor putem pisane obavijesti o raskidu upućene drugoj Ugovornoj strani putem preporučene pošiljke, uz otkazni rok zaključno sa posljednjim danom narednog obračunskog perioda.

Smatra se da je obavijest o raskidu Ugovora zaprimljena od druge Ugovorne strane protekom 3 dana od dana predaje na poštu obavijesti o raskidu Ugovora, pod uslovom da Ugovorna strana koja šalje takvu pošiljku ima dokaz o njenom slanju.

Ugovor prestaje važiti u 24:00 sata zadnjeg dana obračunskog perioda u kojem je istekao otkazni rok, iz stava 1. ovog člana.

U slučaju raskida Ugovora od strane Kupca (osim u slučaju kršenja ugovornih obaveza) a ukoliko je Kupac koristio pogodnost roka plaćanja od 30 dana, Kupac može na pisani zahtjev raskinuti ovaj Ugovor uz otkazni rok od 60 (šezdeset) dana pod uslovom da izmiri svoje dospjele obaveze prema drugoj Ugovornoj strani.

#### **Član 18.**

U slučaju raskida Ugovora od strane Kupca zbog odabira drugog snabdjevača (osim kršenja ugovornih obaveza od strane Snabdjevača), prije isteka ugovora, ili u slučaju raskida Ugovora od strane Snabdjevača zbog kršenja ugovornih obaveza od strane Kupca, Snabdjevač ima pravo na naknadu štete, te ima pravo Kupcu obračunati naknadu štete za prijevremeni raskid ovog Ugovora, kako slijedi:

- a) Kupac je dužan platiti Snabdjevaču naknadu štete za prijevremeni raskid ugovora u iznosu od 10% prosječne mjesečne ugovorene vrijednosti (u skladu sa ugovorenim količinama) za svaki mjesec u kojem električnu energiju nije preuzeo.

Snabdjevač će obračunati iznos naknade štete iz ovog člana, a koji je Kupac dužan platiti Snabdjevaču u roku od 10 dana. Ukoliko Kupac ne plati obračunati iznos naknade štete u ugovorenom roku, naknada štete će se naplatiti iz bankarske garancije iz člana 13. ovog Ugovora ili putem nadležnog Suda.

### **IX OGRANIČENJE I OBUSTAVA ISPORUKE ELEKTRIČNE ENERGIJE**

#### **Član 19.**

Snabdjevač može izvršiti ograničenje ili obustavu isporuke električne energije Kupcu u slučajevima, pod uslovima i na način utvrđen važećim Opštim uslovima.

Ako Kupac ne izvršava obavezu plaćanja u ugovorenom roku, Kupcu može biti izvršena obustava isporuke električne energije nakon isteka roka utvrđenog u Obavještenju o isključenju koji ne može biti kraći od 8 dana.

### **X KVALITET SNABDIJEVANJA**

#### **Član 20.**

Za sigurnost, pouzdanost i kvalitet isporuke električne energije, u skladu sa važećim Opštim uslovima, odgovoran je nadležni ODS.

#### **Član 21.**

Snabdjevač se obavezuje uslugu snabdijevanja električnom energijom obavljati pouzdano i kvalitetno u skladu sa odredbama Zakona o električnoj energiji koje određuju uslove snabdijevanja koje mora ispuniti snabdjevač električne energije.

#### **Član 22.**

Snabdjevač i Kupac oslobađaju se preuzetih obaveza u pogledu isporuke odnosno preuzimanja električne energije u slučajevima obustave isporuke električne energije i ograničenja u isporuci električne energije, u skladu sa važećim Opštim uslovima.

### **XI POVJERLJIVOST**

#### **Član 23.**

Ugovorne strane neće otkriti trećoj strani detalje ovog Ugovora, osim ako ne postoji pismena saglasnost druge strane. Zabrane se ne primjenjuju na nadzorna tijela koja imaju nadležnost nad tom stranom, odnosno na ovlaštene predstavnike institucija BiH. U slučaju da se informacije moraju otkriti, strana koja treba otkriti informacije obavijestit će drugu stranu.

Kupac je saglasan da Snabdjevač može koristiti podatke vezane za ugovorni odnos u svrhu ispunjavanja ugovornih obaveza, a u skladu sa propisima o zaštiti ličnih podataka.

Kupac je saglasan da Snabdjevač može vršiti razmjenu informacija i podataka sa ODS-om, a koji se odnose na mjerna mjesta Kupca, koja su predmet ovog Ugovora.

## **XII VIŠA SILA**

### **Član 24.**

Snabdjevač se oslobađa obaveza u pogledu snabdijevanja električnom energijom u periodu trajanja kvara u sistemu, više sile, radova na mreži, kao i ostalih okolnosti na koje nije mogao uticati.

Snabdjevač nije odgovoran ako ne može ispuniti svoje obaveze zbog razloga koji su na strani Operatora prenosnog sistema i ODS-a odnosno zbog nepoštivanja obaveza koje su utvrđene važećim propisima, a koje imaju Operator prenosnog sistema i ODS. Nastupanje okolnosti iz stava 1. i stava 2. ovog člana oslobađaju Snabdjevača i Kupca izvršavanja obaveza iz Ugovora

### **Član 25.**

U slučaju da je jedna od ugovornih strana, u potpunosti ili djelimično u nemogućnosti isporučiti ili preuzeti električnu energiju zbog više sile, odgovarajuće ugovorne obaveze te ugovorne strane bit će privremeno suspendovane u potpunosti ili djelimično sve dok se određene smetnje ne uklone.

### **Član 26.**

Viša sila znači nastupanje svih događaja i okolnosti koji, da su i mogli biti predviđeni, ne bi mogli biti spriječeni i na koje se ne može uticati, umanjiti ih, otkloniti ih ili ukinuti njihovo djelovanje, što naročito uključuje, ne ograničavajući se: ozbiljne prirodne događaje i nepogode, epidemije, akcije vlasti, ratove, štrajkove, eksplozije koje nisu posljedica nepravilnog i nepažljivog rukovanja i dotrajalosti materijala i opreme.

### **Član 27.**

U slučaju više sile pogođena strana odmah će obavijestiti drugu stranu o uzroku, prirodi, ozbiljnosti, te predviđenom trajanju smetnje, kao i mjerama koje je potrebno poduzeti za rješavanje problema.

### **Član 28.**

Svaka ugovorna strana će učiniti sve kako bi se moguće smetnje otklonile što je prije moguće.

## **XIII NAČIN RJEŠAVANJA SPOROVA**

### **Član 29.**

Ugovorne strane su saglasne da će eventualne sporove rješavati sporazumno u skladu sa odredbama ZOO, Zakona o električnoj energiji, Općim uslovima, Dozvole za rad, Pravilnik o promjeni snabdjevača, drugih pravila i propisa regulatora (FERK-a, i DERK-a), Operatora sistema (NOS BiH), kao i ostalim zakonskim i podzakonskim aktima koji tretiraju ovu materiju.

### **Član 30.**

U slučaju da ugovorne strane ne mogu riješiti spor dogovorom, iste mogu podnijeti zahtjev za rješavanje spora FERK-u.

### **Član 31.**

Za sporove koji se ne mogu riješiti u skladu sa članom 29. i članom 30. ovog Ugovora, ugovorne strane su saglasne da je nadležan mjesno nadležan sud.

## **XIV TRAJANJE UGOVORA**

### **Član 32.**

Ovaj Ugovor stupa na snagu danom obostranog potpisivanja, a traje do ispunjenja njegove svrhe, ali ne duže od jedne godine. U slučaju raskida ugovora, ugovorna strana koja traži raskid ugovora obavezna je da o svojoj namjeri obavijesti drugu ugovornu stranu sa otkaznim rokom od 60 (šezdeset) dana.

## XV ZAVRŠNE ODREDBE

### Član 33.

Ugovorne strane će sve obavijesti i komunikaciju iz Ugovora upućivati jedna drugoj na adresu naznačenu u zaglavlju ovog Ugovora odnosno ugovorene adrese, poštanskom pošiljkom, osim kada je u ugovoru naznačeno da se obavijest odnosno druga komunikacija dostavlja preporučenom pošiljkom, faksom ili putem elektronske pošte.

Smatra se da je obavijest ili bilo koja druga komunikacija, koja se dostavlja poštanskom pošiljkom ili preporučenom poštom, zaprimljena od druge Ugovorne strane protekom 3. dana od dana predaje na poštu, pod uslovom da Ugovorna strana koja šalje pošiljku ima dokaz o slanju.

Ukoliko je obavijest upućena elektronskom poštom, smatra se da je zaprimljena na dan kada je sa e-mail servera Snabdjevača isporučena elektronska pošiljka na e-mail adresu primatelja naznačenu u ovom Ugovoru.

### Član 34.

Ovaj Ugovor sačinjen je u četiri istovjetna primjerka, od kojih svaka Ugovorna strana zadržava po dva primjerka.

Za Snabdjevača:

2 v.d. Generalni direktor

  
Dr.sci. Sanel Buljubašić

v.d. Izvršni direktor za  
snabdijevanje i trgovinu

  
Dr.sci. Nevad Ikanović

Za Kupca:

MINISTRICA

  
Sanja Vlajsavljević

Broj ugovora: 01-04-16249-1/24

Datum: 17.05.2024

Broj ugovora: 06-11-11-1196-5/24

Datum: 03.04.2024.